

LE BUZUJË' LU GUICH SANTIAGO

**Santiago rugapë' Dios bönni'
judío ta'dë'ë Cristo**

1 Neda', Santiago, naca' huen dxin queë' Dios lenca' queë' Xanru' Jesucristo. Rugapa' Dios lbi'ili', nacli' idxinnu cö' di'a dza quegac bunách Israel, náslasli' gdu yödzlyú ni.

Yöl-la' rejni'i runnë' queëru' Dios

²Böchi' lza'adau', cati' gac bi gac queëli' le si' bë' lbi'ili', ral-la' udzjili' gdu láchxi'li' ³le nóziczli', cati' bi rac queëli' le rzi' bë' lbi'ili' ca réjlë'li' Cristo, lë ni rusëdi lbi'ili' cözli' zxon láchxi'. ⁴Gul-güi' láchxi'li' gac gdu yöl-la' zxon láchxi' queëli', quië udx gacli' bönni' ta'yejni'i, len cutu bi yadzj queëli' ca nacgac lë ni.

⁵Chqui' zoa ladj lbi'ili' nu curéjni'ni, ral-la' gnab lahuë' Dios nu na', ati' Dioscz gunnë' qui yöl-la' rejni'i, le runödzjë' szxöni quegac yúgu'të bunách, len cutu ca' rgaccznë' gunnë' queëru'. ⁶Na'a, nu bi r nab lahuë' Dios, run bayúdx tsejlë' Lë', len cugác chop láchxi'. Nu rac chop láchxi', rac qui ca rac qui bdxina' qui nis zxon cati' rutá lei bö', ruzéaj lei bö' na'l ni'l'. ⁷Nu nac cni cutu ral-la' gun löz si' bi

unödzjë' Xanru'. ⁸Bönni' na' reaj bö' láchxi'dau'huë' cutu rdzölnë' nacl gunë'.

⁹Chqui' zoë' bönni' bóchi'ru' rejlé'ë Cristo, len naquë' cuidi'z yödzlyú ni, ral-la' udzijnë' le chnadél-li'në' naquë' blau lahuë' Dios. ¹⁰Bönni' bóchi'ru' na' dë yöl-la' tsahui' queë' ral-la' udzijnë' cati' runë' Dios ga cutur ruzxöni láchxë'ë lë na' dë queë'. Nu ruzxöni láchxi' yöl-la' tsahui' qui, gac qui nu na' ca rac qui xyiji guíxi'dau', la' rdödtë qui. ¹¹Cni nac, le gac qui nu na' ca rac qui xyiji guíxi'dau' na' cati' rlen gbidz rudzá'atsca, la' rbidxtë guixi' na' ati' rguindj xyiji, len rnit yöl-la' lach qui. Lëzca' cni gac queë' bönni' dë yöl-la' tsahui' queë', nitië' tsal ni' runë' dxin rguiljë' yöl-la' tsahui' na'.

Le ta'zì' bë' rë'u

¹²Bica' ba bönni' na' rua' rlenë' le rzi' bë' lë'. Cati' chburujë' dxi'a, gdél-li'në' yöl-la' na'bán gdu, ca na' rdel-li' nu nutsa' lu huitj, nu rdel-li' tu bregui' yöj. Gdél-li'në' bönni' na' yöl-la' na'bán gdu na' gzxi' lu në'ë Dios unödzjë' quegac nup nadxi'igac Lë'. ¹³Cati' bi rac queëru' le run ga gué'niru' gunru' le cunác,

cutu ral-la' gnaru': "Dios rzi' bè'è rè'u len le nac xòhui'." Dios, nutu nu rzi' bè'è len le nac xòhui'. ¹⁴Na'a, chqui' nu bi rac qui le rzi' bè' lei le nac xòhui', nac le rzè ladxi' le cunác, ati' lè ni ben ga gu'ni gun le cunác. ¹⁵Lè na' rzè ládxi'ru' le cunác run ga gunru' dul-la', len cati' chbudx benru' dul-la' na', la' dul-la' na'z ruspaga' rè'u zxguia' gatru'.

¹⁶Böchi' lza'adau', cutu si' ye'i la' cuinzli'. ¹⁷Yúgu'tè le nac dxi'a len yúgu'tè le nac gdu le ruzi'ru' xbey, za' zaca' xtsa'l, r-ruj ga zoè' Xuzru' Dios, Nu ben le ta'yép yös luzxbá, le tu'tsá' cuingac, san Lè' cutu rutsá' cuinë' len cutu rutsé'è ca runè', rúnnteczè' queëru' le nac dxi'a.

¹⁸Ca rè'ncznè' Dios, benè' ga nacru' bunách cub queè'. Bugunè' dxin didza' queè' le nac gdu'tè li, quiè gacru' ca tu glap zi'al queè' ladj yúgu'tè nup na' benzè' Dios.

Le rej ládxi'ru'-nè' Dios le nac gdu

¹⁹Qui lè ni na' rëpa' lbi'ili', böchi' lza'adau', yúgu'tèli' ral-la' soali' sina' yónili', san cutu ral-la' gnétzli' len cutu léytzli'. ²⁰Nu na' rleytèz cutu run le nac tsahui' lahuè' Dios. ²¹Qui lè ni na', gul-cá'n yúgu'tè le cunác, len yúgu'tè le zian le cunác tsahui', ati' lu yöl-la' nòxj ladxi' gul-sí' lu na'li' didza' na' chnayáz icj ládxi'dau'li', le huac gun ga ulali' didza' ni.

²²Na'a, gul-gún ca rna didza' ni, len clèg tsajzéz nagli'. Chqui' yónizli' didza' ni, la' cuinzli' si' yé'ili'. ²³Nu ryöniz didza' ni len cutu run ca rna, nu ni nac ca bönni' ruyúè' lahuè' lu guia dxili, ²⁴le ruyú cuinë' len zhuöjè', ati' la' raltè

ladxè'è ca rnè'è. ²⁵Na'a, nu cutu ral ladxi' le ryöni, san rui' ladxi' zxba queè' Dios le nac gdu len le gac gun ga ularu', ati' tsutsu ugá'n, len guntecz ca rna bè'è zxba na', gac bica' ba nu ni ca nac yúgu'tè le run.

²⁶Chqui' nu bönni' ladj lbi'ili' ráquinë' nac dxi'a ca rej ladxè'è Dios, san cutu run chi'è ludxè'è cui gnézè' ca', bönni' ni rzi' yé'inè' la' cuinzè' ati' cutu rdzag ladxè'è Dios ca rej ladxè'è Lè' bönni' na'. ²⁷Le rej ládxi'ru'-nè' Dios, le nac gdu len le nac dxi'a, nac gáclengacru'-bi' bi'i uzèbdau' lenca' gáclengacru'-nu ngul uzéb, cati' ta'zaca' ta'guí'i nup na', len cui gútsa'ru' le cunác rac yödzyú ni.

Tuz ca ral-la' gunru' bunách ba la'n

2 Böchi' lza'adau', chqui' réjlè'li' Xanru' Jesucristo, Nu nactèr blau, cutu ral-la' utsa'li' ca gunli' ba la'n tu tu bunách. ²Chqui' tsaziè' bönni' ga na' nudubli', nagu'è xbönni' nè'è le náquini oro, len nacuè' lari' záqui'tsqui, ati' tsaziè' ca' bönni' yéchi'dau', nacuè' lari' ca'z, ³len chqui' gunli' ba la'n bönni' na' nacuè' lari' záqui'tsqui, len guièli'-nè': "Grö'len rè'u ga ni nac dxi'a", san guièli' bönni' yéchi'dau' na': "Na'z gzui", o guièli'-nè': "Grö' lyu ni", ⁴chqui' cni runli', rutsa'li' ca runli' ba la'n tu tu lza'li', len run cuinli' ca nu rbequi xbey lzè'i, ati' cutu nac dxi'a ca rza' ládxi'li'.

⁵Böchi' lza'adau', gul-zé nagli' lè ni. Dios gröczè' yugu' bönni', taqui bunách yödzyú ni nacquè' yechi', quiè la'dél-li'nè' yöl-la' tsahui' lahuè' Lè' le ta'yejlè'è Cristo, len gata' quequè' latj ga ni' rna bè'è Lè'.

Gata' quequë' lë na' gzxi' lu nëë
 Dios unödzejë' quegac nup ta'dxí'i
 Lë'. ⁶Lbi'ili' rucanli' ca'z bunách
 yechi' len runcli'-në' ba la'n bönni'
 dë yöl-la' tsahui' quequë', ati' tu'saca'
 zi'ë lbi'ili' bönni' na' dë yöl-la' tsahui'
 quequë', tu'gunë' lbi'ili' dxin. Lëzca'
 tu'dödë' lbi'ili' lu na'quë' bönni'
 yúlahui'. ⁷Yugu' bönni' na' dë yöl-la'
 tsahui' quequë' ta'né' zi'ë ca' qui lë'
 Jesucristo le nactër blau, len ca nac
 lë' nazí' lali' bunách queë' Cristo.

⁸Dxi'a runli' chqui' runli' gdu ca
 rna bë' zxba blau, le nayúj lu guich
 len rna cni: "Ral-la' gdxí'inu' lza'u ca
 nadxí'i cuinu'." ⁹Na'a, chqui' rutsa'li'
 ca runli' ba la'n tu tu bunách, runli'
 dul-la', len nabága'li' zxguia' lu
 zxba queë' Dios, le rguitsjli' zxba
 na'. ¹⁰Chqui' runë' bönni' gdu ca
 rna bë' zxba queë' Dios, san chqui'
 gchíxinë' ca nac tuz le rna bë' zxba
 na', chnabaguë'ë zxguia' qui gdu'të le
 rna bë' zxba na'. ¹¹Lëczë' Dios gnë':
 "Cutu gunu' dul-la' le rguitsj zxba
 qui yöl-la' nutság na'", len gnë' ca':
 "Cutu gdöddu' bunách." Na'a, chqui'
 cutu runu' dul-la' le rguitsj zxba
 qui yöl-la' nutság na', san rudöddu'
 bunách, nabagu'u zxguia' qui gdu'të
 zxba queë' Dios. ¹²Ca gnali' len ca
 gunli', ral-la' gunli' ca ral-la' lun nup
 cuequi xbeynë' lequë' Dios ca rna
 bë' zxba na', le run ga ularu'. ¹³Nup
 cutu tu'huechi' ládxi'gac lza'gac,
 cuequi xbeynë' lequë' Dios ati' nutu
 nu huechi' ladxi' lequë', san nup
 na' tu'huechi' ládxi'gac lza'gac lurúj
 dxi'a cati' cuequi xbeynë' lequë' Dios.

Le ral-la' gunru' le réjlë'ru' Cristo

¹⁴Böchi' lza'adau', cutu bi uzi'ë
 xbey bönni' chqui' gnë': "Réjlë'a

Cristo", san cutu runë' le nac dxi'a.
 Cutu gac ulé' bönni' na' chqui'
 gnazë' rejlé'ë Cristo. ¹⁵Chqui'
 nacu'ë böchi' lza'ru' ta'yëjlë'ë Cristo,
 len cutu dë le lacuë', len cutu dë le
 lahuë' ¹⁶ati' chqui' tu nu dzag lbi'ili'
 guiëz lequë': "Böaj lidxli' dxí'adau';
 chbölj bdzë'ili'", san chqui' cutu
 unódzj quequë' lë na' ta'yadzjnë',
 cutu ca' guclen lequë'. ¹⁷Lëzca' cni
 rac qui nu rnaz rejlé' Cristo. Chqui'
 cutu run le nac bë' nac gdu ca rejlé'
 Lë', cutu nac lsaca' yöl-la' rejlé' qui
 nu na'.

¹⁸Nazx ca' guië' lzë'ë bönni': "Li'
 réjlë'zu' Cristo, ati' neda' runa' le
 nac dxi'a. Cutu gac ului'inu' neda'
 réjlë'u Cristo chqui' cuzóa le nac
 dxi'a runu'. Neda' ului'ida' li' réjlë'a
 Cristo ni'a qui le nac dxi'a runa'."
¹⁹Li' réjlë'u tuzë' naquë' Dios. Nac
 dxi'a ca runu'. Lëzca' cni ta'yëjlë'
 bö' xöhui', len ta'zixitsca tadxí
 Lë'. ²⁰Li', bönni' cunözi. Ral-la'
 gnözcznü' chqui' zoa nu rnaz rejlé'
 Cristo, san cutu run le nac dxi'a,
 cutu nac lsaca' yöl-la' rejlé' Lë' qui
 nu na'. ²¹Nac bë' burujë' dxi'a
 xuzru' Abraham lahuë' Dios ni'a
 qui lë na' benë', cati' ni' glu'ë-bi'
 lahuë' Dios bi'i Isaac queë'. Glu'ë-bi'
 ca na' tun bunách ta'gú'u le
 tu'zegui'ë-bi'. ²²Na'a gac gnózili' ca
 guc queë' Abraham. Lë na' benë'
 guc bë' gyejlë'ë Dios. Qui lë ni na'
 nac bë' guc gdu ca gyejlë'ë Dios
 ni'a qui lë na' benë'. ²³Cni guc lë na'
 nayúj lu guich la'y, rna: "Gyejlë'ë
 Dios Abraham, ati' Dios blé'inë' lë
 na' benë' ca tu le ben ga böaquë'
 tsahui' Abraham." Qui lë ni na' gzxi'
 lë': "Lzë'ë Dios."

²⁴Na'a, rlé'icizli' nac bë' ruruje' dxi'a bönni' ni'a qui le runè', len clègz le rejlé'ë Dios. ²⁵Lèzca' cni guc queënu Rahab, ngul bë'nu latj bunách. Lèzca' nac bë' burujnu dxi'a le zoa tu le dxi'a bennu, lè na' bennu cati' ni' bennu ba la'n yugu' bönni' uyulan, len gúclennu lequè' quiè guluguel-lè'ë yhuöjquè' nöz yubl. ²⁶Ca na' rac qui gdu ca nayá' nabinru' chqui' cutu yu'u bö', chnat, lèzca' cni nac qui le réjlè'ru' Cristo chqui' cutu nalá' yöl-la' run qui, cutu nac lsaca'.

Yugu' le rna lúdxiru'

3 Böchi' lza'adau', cutu guntèz zian cuinli' nup tu'sèdi bunách, le chnózcizli' zi'tèr cuequi xbeynè' rè'u Dios, nulru' rusèdiru' bunách. ²Yúgu'tèru' runru' zian le rchixi rníguiru'. Chqui' cutu rchixi rnignè' bönni' ca nac didza' ru'è, bönni' ni naquè' gdu tsahui', len rac gna be'i cuinè' ca nac yúgu'tè le runè'. ³Cati' rgu'ru' guia rú'acba' böa' quiè gunru' ga lunba' ca ré'niru', rac gna bé'iru' lecba' gdutè ca tunba'. ⁴Gul-yú ca' ca rac quegac barco. Zal-la' zxöntèr nac barco len szxöni reycj bö' ruzéaj lei, cuídi'dau'z nac në'i xyagui barco na' le ruzéycj rudxi'i barco quiè tseaj gátitèz ga guè'nnè' bönni' rusé'è lei. ⁵Lèzca' cni nac lúdxiru'. Zal-la' cuídi'tèr nac, ziantèr le rna lúdxiru' na'. Gul-yutsca' ca run gui'. Zal-la' gui'dau'z rbibru', gui'a sib huayegui. ⁶Lèzca' nac ca tu gui' lúdxiru' na'. Yúgu'tè le cunác rac yödzlyú ni rna lúdxiru', len le dzag gdu ca nayá' nabinru' lúdxiru' na', qui lè ni na' run ga rac xöhui' gdutè le

nacru'. Rbequi gui' le rna lúdxiru', le ruzegui' rè'u ca nac yúgu'tè le runru', ati' le rna cni lúdxiru' na', nac qui, tsca chnaguél-la'tè gui' le nabequi tu' xöhui'. ⁷Yúgu'tèba' böa' guixi' ta'daba' luyú, len yugu' böa' zoa xilcba', len yugu' böa' talyj lè'ba' lyu, lenca' yúgu'tèba' böa' dzö'ba' lu nis zxön, huac la'ná be'i lecba' bunách luyú ni, ⁸san nutu nu bönni' gac gna bé'inè' ludxè'è, le rna lúdxiru' le cunác len cutu gac nu uzaga' xnözi, ati' ziantèr le rna lúdxiru' le nac ca tu le naché' yöl-la' gut. ⁹Len la' lúdxiru' na'z rulídz tsáhuiru'-nè' Dios Xuz, len rulídz ditjru'-nè' ca' bönni', bönni' na' benè' lequè' Dios ca nacczè' Lè'. ¹⁰Cni nac, len la' rú'azru' na' rulídz tsáhuiru' bunách len rulídz ditjru' bunách. Böchi' lza'adau', cutu ral-la' gac cni. ¹¹Cutu ca' ta'lén nis ziziá' len nis zöna' la' tuz ga ta'lén. ¹²Böchi' lza'adau', cutu gac cuia le rbia yag olivo tu lu yag higo, len lèzca' cni, cutu gac cuia le rbia yag higo na' tu lu lba uva. Lèzca' cni, nitú ga rlen nis cutu gac la'lén nis zöna' len nis ziziá'.

Yöl-la' rejni' le nac gdu

¹³Chqui' zoè' ladjli' bönni' raquè' szxöni len réjni'tsquinë', lu yöl-la' nöxj ladxí' queè' ral-la' ulu'è naquè' cni ni'a qui le nac dxi'a runè'. ¹⁴Na'a, chqui' ruzxé'ili' lza'li' len runli' dxin quiè la'gú'u lbi'ili' yöl-la' ba bunách, cutu ral-la' gun ba zxön cuinli' ca nac yöl-la' rejni'i queèli'. Nu run cni rzi' yè', len rdá'baga' le nac gdutè li. ¹⁵Yöl-la' rejni'i cni cutu nac le runödzjè' Dios, san qui yödzlyú ni nac, len

qui bunách yödzyú ni, len qui tu' xöhui'. ¹⁶Bönni' tu'zxé'iné' lza'quë' len të'nné' la'gú'u lequë' yöl-la' ba bunách, lëzca' ta'díl-l didzë'è len tunë' yúgu'të le cunác. ¹⁷Bönni' napquë' yöl-la' rejni' na' runödzejë Dios:

tunë' le nac gdu dxi'a,
len ta'bözë' dxí'adau',
len nacquë' zxön ladxí',
len nacquë' nöxj ladxí'.
Tu'huechi' láchxi'quë' bunách,
len tunë' le nac dxi'a.
Tuz ca ta'bequi xbey lza'quë',
len cutu ta'bíj bë'i lza'quë'.

¹⁸Nup tui' láchxi'gac la'bequi dxi le rac, ta'bóz dxí'adau', quië gac ca' dxi'a gdu'të le nacgac.

Nup tun zxön le nacué' yödzyú

4 ¿Bizx quië na' rdil-li' len rac didza' bizxj queëli'? Rac cni queëli' le rzë láchxi'li' zian le rzë láchxi'li' tu tuli', len qui lë ni na' rdíl-lenli' lza'li'. ²Zian le ruhuídi'li' len le cutu rzi'li' lei, qui lë ni na' rudódili' bunách. Ruzxé'ili' le dë qui lza'li', len le cutu rdél-li'li' lei, qui lë ni na' rzu rbö'li' len rdil-li'. Cutu rata' queëli' le ré'nili', le cutu rnabli' lei lahuë' Dios. ³Zal-la' zoa bi rnabli', cutu bi rzi'li', le cutu nac dxi'a ca rnabli', le ré'nili' lë na' rnabli' quië ugunli' lei dxin ca dzagz láchxi'li'. ⁴Lbi'ili', bunách nusanli'-në' Dios, ínaru' cu nózili' chqui' runli' zxön le nacué' yödzyú ni, chnuhuoacli' ca nu curle'i Dios dxi'a? Núti'tëz nu rë'ni gun zxön le nacué' yödzyú ni, nuhuoác ca nu curle'i Dios dxi'a. ⁵Cutu rnaz ca' le nayúj lu guich la'y, rna: “Dios rsölë'è queëru' Dios Bö' La'y, Nu

zoalen rë'u, ati' Lë' nadxi'iné' rë'u len rudúl-li'né' rë'u chqui' rusanru'-në'.” ⁶Na'a, zxöntër le ruzá' ladxë'è queëru' Dios, le nayúj lu guich la'y, rna: “Dios ruzaguë'è xnözgac nup tun ba zxön cuingac, san ruzá' ladxë'è quegac nup nacgac nöxj ladxí'.” ⁷Qui lë ni na', gul-zóa nöxj ladxí' lahuë' Dios. Gul-ná bë'i tu' xöhui', ati' uzxúndj ga zoali'. ⁸Gul-güi' láchxi'li' sóalenli'-në' Dios, ati' Lë' dusóalenë' lbi'ili'. Lbi'ili', bunách dul-la', gul-gác dxi'a, len cutur gunli' dul-la'. Lbi'ili', nul-li' reaj bö' láchxi'dau'li', len chop le nadxi'ili', gul-gún dxi'a icj láchxi'dau'li'. ⁹Gul-sëbi láchxi'li', len gul-hui'ni, len gul-códx. Na'a ruzxidxi' san ral-la' cödxli'. Rudzjili' san ral-la' huí'nili'. ¹⁰Gul-gác nöxj ladxí' lahuë' Xanru', ati' Lë' gunë' ga gacli' blau.

Cutu ral-la' glag yudxru' le run lza'ru'

¹¹Böchi' lza'adau', cutu gnëli' qui lza'li' tuli' yetuli'. Nu rnë qui böchi' lzë'i, len rlag yudx le run nu na', nu ni rnë qui zxba queë' Dios, len rbequi xbey le rna bë' zxba na'. Na'a, chqui' rbequi xbeynu' le rna bë' zxba na', run cuinu' nu rbequi xbey lei, len cutu runu' ca rna bë' zxba na'. ¹²Na'a, tuzë' naquë' Dios, Nu ben zxba na', len naquë' ca' Nu rbequi xbey le runru'. Lëczë' gac uslé' bunách o usnitië' bunách na'. Na'a, ínúxatë run cuinu', rlag yudxu' lza'u?

Cutu gunru' löz le gac cxö huidzj

¹³Na'a, gul-zé nagli', nul-li' rnalí: “Cxö huidzj tseajtu' yödzyú ni', ati' soatu' ni' tu iz len zian le gá'utu'

len úti'tu', ati' cni gáta'tsca queëtu' dumí." ¹⁴Cutu nózili' bizxa gac cxö huidzj. ¿Nacxcz nac queëru', tsca zoaru' yödzyú ni? Nacru' ca böchlá le nalá' tu chí'dau'z, len la' rnittè. ¹⁵Qui lè ni na', cni ral-la' gnali': "Chqui' guè'nnè' Xanru', soaru' gbanru', len tu tu le gunru'." ¹⁶Na'a, lbi'ili', lu yöl-la' run ba xön queëli' rgu'li' yöl-la' ba la' cuinzli'. Le cunác nac yúgu'tè le cni runli'. ¹⁷Chqui' nóziru' le nac dxi'a le ral-la' gunru', len cutu gunru' lè na', dul-la' runru'.

Santiago rusé'è ládxi'què' bönni' dè yöl-la' tsahui' quequè'

5 Lbi'ili', bönni' rlé'ili' yöl-la' tsahui', gul-códx len gul-cödxya'a, le zi'a za' dza glé'ili' yöl-la' yechi'. ²Chnac ditj yöl-la' tsahui' queëli', ati' chnutöc'ba' le náculi' bëldau' qui. ³Chnac qui dumí oro len dumí plata queëli' ca nac qui guia zön xquè'i, ati' xquè'i na' nac ca tu le ruquí lbi'ili', ati' gac queëli' ca tu gui' le usnít lbi'ili'. Cni gac queëli', le busá' butubli' queëzli' yöl-la' tsahui' dza ni zoaru' chrajséytégac. ⁴Gul-yutsca'. Chta'náb yudxnè' lazjquè' bönni' huen dxin gulalapè' yöl queëli', le cutu rguízxjnili' lequè', ati' lè na' ta'nabè' bönni' huen dxin na' chb'ou' didza' na' lahuè' Xanru', ati' Lè' rna bé'inè' ni'a nè'è guizx yu. ⁵Yödzyú ni benli' ga buné'ili' len güi' gdáguteczli' le rnaz queëli'. Buxón cuinli', san chzoa gdxin queëli' dza udx queëli'. Gac queëli' ca rac queëba' bëdx renni', chbdxin dza gdódiru'-ba'. ⁶Rchúguli' quequè' bönni' tsahui' len rudódili' lequè',

ati' lequè' cutu ta'dá'baguè'è lbi'ili' rudódili' lequè'.

Cözru' xön ladxí' len ulidzru'-nè' Dios

⁷Na'a, böchi' lza'adau', gul-cóz xön ladxí' ga gdxinr dza huödè' Xanru'. Gul-yú ca runè' bönni' guz gu'n. Lu yöl-la' rböz xön ladxí' rbözè' guiöjsiu' len guiöj beo' lin, ati' tód ni' lapè', len sxöni utubè' yöz. ⁸Lèzca' cni, lbi'ili' na' réjlè'li' Cristo, gul-cóz xön ladxí' len gul-típ ládxi'li', le chza' gal-la' dza huödè' Xanru'. ⁹Böchi' lza'adau', cutu gnèli' qui lza'li' tuli' yetuli', cui gbága'li' xzguia'. Gul-yutsca'. Chrdzag lau udxinè' Xanru', Nu cuequi xbey le runli'. ¹⁰Böchi' lza'adau', gul-yú ca guc quequè' bönni' glu'è didza' uláz queè' Xanru'. Nacquè' ca tu le rulu'í' rè'u ca ral-la' saca' qui'ru' len cözru' xön ladxí'. ¹¹Na'a, nucua'ru' lequè' ca bönni' glaquè' bica' ba, nup ni' gulazaca' gulaguí'i. Chbyónili' ca benè' Job. Glözè' xön ladxí' zal-la' sxöni gzxaca' gdi'è, ati' nózili' ca' ca benè' queè' Xanru' ga budxtè. Ruhuéchi'tsca ladxè'è rè'u Xanru' len rui' ladxè'è rè'u. ¹²Böchi' lza'adau', le nactèr blau nac lè ni rëpa' lbi'ili': cutu gneyli' Nu zoa yehua' yubá, len cutu gneyli' le nacúa' luyú ni, len cutu gneyli' bíti'tèz bi run tsutsu xtídza'li'. Cati' gnali': "Ja", ral-la' gnazli': "Ja." Cati' gnali': "Cutu", ral-la' gnazli': "Cutu." Cni ral-la' gunli', cui gbága'li' xzguia' lahuè' Dios. ¹³Chqui' rzaca' rgu'i nu dzag lbi'ili', ral-la' ulídz Dios nu na'. Chqui' zoa nu rudziji, ral-la' gul-l

yöl-la' ba nu na'. ¹⁴Chqui' re'i nu dzag lbi'ili', ral-la' ulídz bönni' gul tun chi'ë bunách queë' Cristo, quië lulidzë' Dios, la'nabné' Lë' unë' bönni' huë' na'. Ral-la' la'gu'ë lë' le za, len lugunë' dxin lë' Xanru'. ¹⁵Cati' lulidzë' Dios, len ta'yejlë'ë gunë' Cristo ga huöaquë' bönni' huë' na', ni'r gunë' Xanru' ga huas uzöë', len chqui' benë' dul-la' bönni' huë' na', Xanru' unít lahuë' lë'. ¹⁶Qui lë ni na', gul-xoalëp dul-la' nabága'li' tuli' yetuli', len gul-náb qui lza'li' tuli' yetuli' lahuë' Dios quië unë' lbi'ili', urúj guidzhuë' na' ré'ili'. Le rulidzë' Dios bönni' tsahui', le runë' gdu ladxë'ë, nactsca lsaca'. ¹⁷Elías, bönni' ni'

bë'ë didza' uláz queë' Dios, guquë' bönni' yödzyú ca nacru' ré'u, san cati' bulidzë' Dios, gnabë' lahuë' cui gal guiöj, gdu tsonn iz yu xop beo' cutu gul guiöj luyú ni. ¹⁸Gdöd ni' bulidzë' Dios leyúbl, ati' böal guiöj, ati' bunódzj le glazë' bönni' dza ni'.

¹⁹Böchi' lza'adau', lë ni ral-la' gnózili'. Chqui' nunbë' le nac gdutë li nu dzag lbi'ili' len rchixi rnigui, ati' zoa nu gun ga ubí'i ladxí' nu na' rchixi rnigui, ²⁰nu na' gun ga ubí'i ladxë'ë bönni' dul-la' na' gdë' ga yubl, uslé' lu yöl-la' gut bönni' dul-la' na', len gunë' ga unít lahuë' Dios dul-la' zian nabaguë'ë bönni' na'. Ca' gac.